

III. PAZKO IGANDEA (A)

Otoitza

Poztu dadila beti, Jauna,
biziberritu eta gaztetu duzun zeure herria;
iguzu, zure seme ordekotza berriturik pozez gaudenok,
uste sendoenaz itxaron dezagula piztuera eguna.
Zure Seme Jesu Kristo.

I. IRAKURGAIA: Ap Eg 2, 14. 22b-28

Hura ezin zitekeen heriotzaren menpean egon.

Apostoluen Eginetatik

Pentekoste-egunean, Pedrok, hamaika apostoluen artean zutik, ahotsa indartuz, honela hitzegin zuen: «Judutar eta Jerusalem bizi zareten guztiok, entzun eta jarri erne zeuen belarriak nire hitzetara: Nazareteko Jesusez mintzo natzaizue; Jaungoikoak sinesgarri egin zizuen gizon hori; Haren bidez egin baitzituen, zuek dakizkizuen miragarriak, harrigarriak eta ezaugarriak. Jainkoak erabakia eta aurrez jakina zeukan bezala, zuen eskuetara emana izan zen gizon hau, eta zuek hil egin zenuten, jentilen eskuz gurutzean josiz; baina Jaungoikoak piztu egin zuen, heriotzaren lokarriak askaturik. Hura ezin baitzitekeen heriotzaren menpean egon.

Izan ere, honela dio Dabidek Harengatik:

"Begi aurrean ikusten nuen beti Jauna;
eskuinean daukadala, ez naiteke dardara.
Horregatik alai daukat bihotza, pozik mingaina,
eta haragi honek ere itxaropenean du atsedena.
Ez baituzu nire bizia Leizera egotziko,
ezta zure zintzoa ustelak hartzen utziko.
Bizirako bidea erakutsi didazu,
zeure aurrean alaitasunez beteko nauzu"».

ERANTZUN SALMOA: Sal 15, 1-2a eta 5. 7-8. 9-10. 11

R/. **Bizirako bidea erakutsiko didazu, Jauna.**

Edota: **Aleluia.**

Zaindu nazazu, Jauna,
babes bila bainator Zugana.
Honela diotsot Jaunari: «Zu zaitut neure jabe».
Jauna da nire ondare eta edontzia;
Zuk daukazu eskuetan nire zoria. R/.

Onesten dut Jauna, aholku eman didalako,
gauz ere neure bihotzak oharrarazten nauelako.
Begi aurrean ipintzen dut beti Jauna;

eskuinean daukadala, ez naiteke dardara. R/.

Horregatik alai daukat bihotza, pozik barrena,
haragi honek ere bakean du atsedena.
Ez baituzu nire bizia Leizera egotziko,
ezta zure zintzoa ustelak hartzen utziko. R/.

Bizirako bidea erakutsiko didazu:
alaitasun betea zeure aurrean,
betiko atseginak zeure eskuinean. R/.

II. IRAKURGAIA: 1 P 1, 17-21

*Bildots errugabe den Kristoren odol ederrez
izan zarete erosiak.*

San Pedro Apostoluaren epistolatik

Senide maiteok: Zuek Aita esaten diozuenak bakoitzaren egintzen neurrian eta bereizkuntzarik gabe epaitzen duenez gero, joka ezazue zintzo bizitza honetan. Badakizue zuen gurasoengandik hartutako biziera hutsaletik, ez zaretela gauza ustelkorrez erosiak izan –ez urrez, ez zilarrez–, baizik eta Bildots errugabe eta kutsugabe den Kristoren odol ederrez: mundua mundu den baino lehendik ezagutua izan zena eta azken aldian zuengatik agertua. Haren bidez sinesten duzue zuek, Hura hilen artetik piztu eta goratu zuen Jainkoarengan, eta horrela zeuen sinesmena eta itxaropena Jainkoarengan jarri duzue.

EBANJELIOA: Lk 24, 13-35

Aleluia: Ikus Lk 24, 32

R/. Aleluia.

V/. Jesus Jauna, ager iezazkiguzu Liburu Santuak;
sutu gure bihotzak, hitzegiten diguzunean. R/.

Ogia zatitzean ezagutu zuten.

Jesu Kristoren Ebanjelioa San Lukasen liburitik

Jesusen bi ikasle, Jerusalemetik bi orduko bidean dagoen Emaus izeneko herri txikira zihoazen. Eta gertakizun guztietaz elkarrekin hizketan ari ziren. Elkarrekin hizketan eta eztabaidan ari zirelarik, Jesus berbera hurbildu zitzairen, eta haiekin batean zihoan; haien begiak, ordea, itsu zeuden eta ez zuten ezagutu.

Hark esan zien: «Zer da, bidean dakarzuena hizketa hori?» Eta goibeldurik gelditu ziren. Kleofas zeritzan bietako batek hitza hartuz, esan zion: «Zu bakarrik al zaitugu horren arrotz Jerusalem, egun hauetan han gertatu direnak ez jakiteko?» Jesusek erantzun: «Zer, bada?»

Eta haiek: «Nazaretoko Jesusi gertatua. Profeta baitzen, egitez eta hitzez gizon ahaltsua, Jaungoikoaren eta herri guztiaren aurrean; nola apaiz nagusiek eta gure agintariek heriotzarako eman eta gurutzean josi zuten. Guk, berriz, Israel askatuko zuena Bera zela uste genuen; baina hirugarren eguna da, hori gertatu zela. Gure arteko emakume batzuek, berriz, harrituta utzi gaituzte: goizean goiz hilobira joan eta Jesusen gorpurik aurkitu gabe itzuli ziren; eta bizi dela

zioten aingeruak ikusi omen zituzten. Joan ziren guretar batzuk ere hilobira; eta emakumeek esan bezala aurkitu zuten; Bera, ordea, ez zuten ikusi».

Orduan Jesusek esan zien: Bai zentzugabeak zaretela! eta Profeten hitzak sinesteko motelak! Ez al zuen, bada, Mesiasek hori jasan behar, bere aintzan sartzeko?» Eta Moisesengandik hasi eta profetaz profeta, Liburu Santuan Hartaz idatzitako guztia agertu zien.

Zihoazen herrira iritsi zirenean, Berak aurrera zihoalako egin zuen. Baina haiek, geldierazi nahiz, honela ziotsaten: «Zaude gurekin; berandu da eta eguna iluntzera doa». Eta sartu egin zen haiekin egoteko.

Haiekin mahaian zegoela, ogia hartu, bedeinkapen otoitza egin, zatitu eta eman zien. Orduan ireki zitzaizkien begiak eta ezagutu zuten. Bera, ordea, itzali egin zitzaien.

Orduan honela esan zioten elkarri: «Ez al genuen sutan gure bihotza, bidean hitzegiten zigunean, eta Liburu Santuak adierazten zizkigunean?» Eta berehala altxa eta Jerusalem itzuli ziren. Han aurkitu zituzten Hamaikak eta haien lagunak, esaten: «Piztu da Jauna egiaz eta Simoni agertu zaio».

Haiek adierazi zuten bidean gertatu zitzaiena, eta nola ezagutu zuten ogia zatitzean.

Oparigaien gainekoa

Onar, Jauna, zure Elizak pozik ekarritako eskaintzak,
eta, horrelako poza eman diozunez gero,
emaiozu fruitutzat betiko zoriona.
Jesu Kristo.

Prefazioa: Pazkoaldikoa.

Jaunartze ondorengoa

Begira, Jauna,
sakramentuen bidez berriztatu duzun zeure herriari;
eta, bizitza hilezkorrerako egin gaituzunez gero,
emaguzu piztuerara iristea.
Jesu Kristo.